

दिनांक 20.07.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- संसदीय कार्य मंत्री किरन रिजिजू कह्यो— संसद रा सुचारू संचालन खातिर सरकार अर विपक्ष रे बीच सहयोग जरूरी।
- मुख्यमंत्री भजन लाल शर्मा राज्य मांय बिरखा सूं उपजी स्थिति री समीक्षा कर र राहत अर बचाव कामां मांय तेजी लावण रा हुकम दिया।
- राजस्थान उच्च न्यायालय के मुख्य न्यायाधीश के. आर. श्रीराम काले शपथ लेवेला।

अर

- प्रदेश में घणखर ठौड़ां माथे बिरखा री गतिविधियां मांय थोड़ी कमी आई— आवता दो दिनां उत्तरी अर दक्षिण—पूर्वी हलकां मांय हल्की सूं मध्यम बिरखा रा आसार।

000

संसद रो मानसून सत्र काले सूं सरु इण सूं पैल्या इण रे सुचारू संचालन खातिर आज नुवी दिल्ली मांय सर्वदलीय बैठक करी। बैठक मांय न्यारा—न्यारा राजनीतिक दळां रा सदन रा नेता भेळा व्ह्या। केंद्रीय मंत्री अर राज्यसभा मांय सदन रा नेता जगत प्रकाश नड्डा, बैठक री अध्यक्षता करी जिण मांय संसदीय कार्य मंत्री किरन रिजिजू, संसदीय कार्य राज्यमंत्री अर्जुन राम मेघवाल अर डॉ. एल. मुरुगन भी भेळा व्ह्या। बैठक मांय, कांग्रेस सूं गौरव गोगोई अर प्रमोद तिवारी, राष्ट्रवादी कांग्रेस पार्टी—शरद पवार गुट सूं सुप्रिया सुले, डी.एम.के. सूं टी.आर. बालू अर तिरुचि शिवा, समाजवादी पार्टी सूं राम गोपाल यादव अर आम आदमी पार्टी सूं संजय सिंह मौजूद रहे। मानसून सत्र काले सूं 21 अगस्त ताई चालेला। सत्र रे चालता, दोन्यू सदनां री कुल 21 बैठकां व्हेला। इण रे चालता जन विश्वास (संशोधन) विधेयक, राष्ट्रीय खेल प्रशासन विधेयक अर मर्चेट शिपिंग विधेयक समेत केई खास विधेयकां माथे चर्चा होणे री आसा है। सर्वदलीय बैठक रे पाछे संसदीय कार्य मंत्री किरन रिजिजू कह्यो के बैठक बेहद रचनात्मक री। वणा कह्यो के सदन रा नेता मुद्दा माथे आप—आप रा दळा रो पक्ष रखे जका ने वे सदन रे चालता उठाणो चावे है। श्री रिजिजू कह्यो के सरकार विपक्ष सूं दोन्यू सदनां रो सुचारू संचालन पक्को करणे री अरज करी है। वणा कह्यो के सत्ता पक्ष अर विपक्ष दोन्यू नें आपसी समझबूझ से साथे मिल र काम करणो चाहिजे।

.....

000

बनारस रेल इंजन कारखाने मांय छह हजार अश्वशक्ति वालो ढाई हजारवों इलेक्ट्रिक इंजन तैयार कर लियो है। ओ इंजन वातानुकूलित केबिन, मॉनिटरिंग प्रणाली, अत्याधुनिक ब्रेकिंग अर गियर सूं लैस है। जानकारी रे मुजब इण री रफ्तार 140 किलोमीटर प्रतिघंटा है। बनारस लोकोमोटिव ढाई हजार इलेक्ट्रिक इंजन बणावण री आ उपलब्धि महज आठ साल मांय हासिल करी है। इण कारखाना मांय अबै ताई कुल डीजल इंजन समेत 10 हजार 8 सौ 22 इंजन बणाया जा चुक्या है।

000

नीति आयोग उपाध्यक्ष सुमन बेरी कह्यो है कि सतत विकास लक्ष्यां रे दिशा मांय भारत री प्रगति सामाजिक सुरक्षा व्यवस्था अर आर्थिक सुधारां रो नतीजो है। नीति आयोग अर संयुक्त राष्ट्र मांय भारत मांय स्थायी मिशन कानी सूं न्यूयार्क मांय साझां रूप सूं राखीज्या कार्यक्रम रे चालता वणा आ बात कही। श्री बेरी कह्यो के बरस 2013—14 सूं 2022—23 रे चालता 24 करोड़ लोग गरीबी रेखा सूं बारे

लाया गया है अर इण अवधि रे चालतां सामाजिक सुरक्षा कवरेज दुगणे सूं भी बेसी बध गयो है। वणा कह्यो है कि भारत **शिशु-मातृ मृत्यु दर** अर **बाल मृत्यु दर** मांय कमी रो लगस 2030 री समय-सीमा सूं घणो पैले हासिल कर लेवेला। ध्यान जोग है कि लारला म्हीना सतत विकास संबंधी ताजा रपट मांय 167 देशां मांय भारत ने 99 वी जगह मिली ही। ओ पैलो मौको हो जदे भारत इण रपट रे सरुआती सौ देशां मांय जगह बणावण माथे सफल रह्यो है।

000

मुख्यमंत्री भजन लाल शर्मा ने आज मुख्यमंत्री निवास माथे राज्य मांय बिरखा सूं उपजी स्थिति री एक बैठक मांय समीक्षा करी। इण रे चालता बणा प्रदेश रा प्रमुख बाधां मांय पाणी री आवक रे बारा मांय जाणकारी ली। वठिने बिरखा प्रभावित खेतरां रे बारा मांय भी फीडबैक लियो। वणा कह्यो अहलकारां ने बचाव अर राहत कामां मांय तेजी लावता व्ह्या सगळी जरूरी तैयारियां पक्की करणे रा हुकम दिया। बैठक रे चालता श्री शर्मा न्यारा-न्यारा जिलां रा कलेक्टरां सूं स्थिति रे बारा मांय जाणकारी ली। बैठक मांय मुख्य सचिव सुधांश पंत, पुलिस महानिदेशक राजीव शर्मा समेत दूजा न्यारा-न्यारा महकमां रा मोटा अहलकार मौजूद रह्या।

000

राज्यपाल हरिभाऊ बागडे काले राजस्थान उच्च न्यायालय रा मुख्य न्यायाधीश के. आर. श्रीराम ने शपथ दिलावेला। राजभवन सूं जारी विज्ञप्ति रे मुजब सिंज्यां 4 बजे शपथ ग्रहण समारोह राख्यो जावेला। ध्यान जोग है की के.आर. श्रीराम मुम्बई विश्वविद्यालय सूं एलएलबी करणे रे पाछे लन्दन सूं समुद्री विज्ञान मांय एल.एल.एम. कर्यो वे जुलाई 1986 ने महाराष्ट्र अर गोवा बार कौन्सिल मांय वकील रा रूप मांय पंजीकृत व्ह्या। वां ने 21 सितम्बर 2024 ने मद्रास हाईकोर्ट रे मुख्य न्यायाधीश रे पद माथे पदोन्नत कर्यो गयो हो।

000

प्रदेश रा सगळा डाकघरां मांय काले कोई सार्वजनिक लेन-देन नी व्हेला। 22 जुलाई सूं शुरू हो रही-**एडवान्सड पोस्टल टेक्नोलॉजी एप्लिकेशन** रे संचालन ने देखता थकां राजस्थान डाक परिमण्डल ओ फैसलो कर्यो है। इण रे चालता **डेटा माइग्रेशन, सिस्टम सत्यापन अर कॉन्फिगरेशन** प्रक्रियावां ने को सुविधाजनक बनावण खातिर सेवावां रो ओ अस्थायी निलंबन जरूरी है, ताकि नुवी प्रणाली सुचारू रूप सूं हो सके है। राजस्थान डाक परिमंडल ग्राहकां सूं अपील करी है कि, वे महकमां मांय हो रह्या इण परिवर्तन सूं हो री असुविधा सूं बचणे खातिर आपरी योजना इण सूचना रे मुजब ही बणावे।

000

भरतपुर जिला मांय बाल तस्करी ने रोकणे खातिर जन जागरूकता कार्यक्रम सरु कर्यो गयो है। म्हाणा संवाददाता बतायो के इण कड़ी मांय आज रेलवे स्टेशन माथे जागरूकता गतिविधियां राखीजी।

.....

000

जयपुर रा झालाना थापित **प्रौढ़ शिक्षण समिति** रा सभागार मांय आज तीन लेखिकावां री पुस्तकां रो विमोचन व्ह्यो। इण मांय उजला लोहिया, लक्ष्मी शर्मा अर मनीषा कुलश्रेष्ठ री पुस्तक भेळी है। इण मौके माथे पंकज सुबीर सगळी किताबां री जाणकारी दी।

.....

000

प्रदेश मांय लारला कुछ दिनां सूं हो री गतिविधियां मांय आज थोड़ी कमी निजर आई। वठिने बित्यां चौबीस घंटा मांय राज्य मांय सब सूं बत्ती 14 सेंटीमीटर बिरखा माउंट आबू मांय दरज करीजी। जोधपुर रा ओसिया मांय 10, बाड़मेर अर जालौर जिला रा सायला मांय 8-8, जैसलमेर, पाली, नागौर रा खींवरसर अर जोधपुर रा शेरगढ में 7-7 सेंटीमीटर पाणी बरस्यो। पाली मांय आज सुवारं सूं बादळ छायाड़ा रिया अर दुपहरा पाछे रिमझिम बिरखा सूं मौसम सुहावणो व्हे गयो। वठिने लारला दिनां व्ही बढ़िया बरसात सूं बाधां मांय चौखी आवक होणे सूं 15 बांध लबालब हो गया। आज रविवार छुट्टी रो दिन होणे सूं **हेमावास बांध अर गोरमघाट** समेत न्यारा-न्यारा पर्यटक स्थलां माथे घणी तादाद मांय लोग पिकनिक मनावण ताई पहुंचया। अजमेर मांय लारला दो दिनां सूं व्ही तेज बिरखा रे पाछे आज बरसात रुकणे अर धूप खिलने सूं लोगां राहत ली। और ब्यौरो म्हाणा खबरनवीस सूं-

.....

मौसम केन्द्र जयपुर रे मुजब आवता दो दिनां ताई उत्तरी अर दक्षिण—पूर्वी राजस्थान रा कुछएक हळकां मांय हल्की सूं मध्यम बिरखा होणे री आसा है। वठिने प्रदेश री घणखर ठौड़ां मांय आगले एक सप्ताह ताई भारी बिरखा री गतिविधियां मांय कमी आवेली।

000

प्रदेश री न्यारी—न्यारी जगावां माथे आ दिनां कावड़ जात्रावां री रौनक निजर आ रही है। सावन रे म्हीने मांय भगवान शिव रे जलाभिषेक खातिर पवित्र सरोवरां सूं जल लाणे खातिर कावड़ जात्रावां निकाळी जा रही है। इणी कडी मांय आज राजसमंद रा कांकरौली सूं कांवड़ यात्रा निकाळी ज्यी। वठिने भीलवाड़ा मांय पूर्वांचल सेवा समिति री कानी सूं संत महात्मावां री मौजूदगी मांय एक बड़ी कांवड़ जात्रा सरू व्ही। जात्री शहर सूं पांच किलोमीटर दूर हरणी महादेव पहुंच र भगवान शिव रो अभिषेक कर्यो। राजधानी जयपुर मांय भी आज सुवांरे सूं खास मार्गा माथे बड़ी तादात मांय कांवड़ जात्रावां निजर आयी। पवित्र तीर्थ स्थल गलता सरोवर सूं कांवड़ जात्री जल भर र आपरे गनतव्य खातिर रवाना व्हा।

000

सेना, 'ऑपरेशन सिंदूर' रा किशोर योद्धा, पंजाब रा फिरोजपुर रा 10 वर्षीय स्वर्ण सिंह री सगळी शैक्षिक ज़रूरता पूरी करेला। मास्टर स्वर्ण सिंह ऑपरेशन रे चालता इण सीमावर्ती ज़िला मांय आप रे खेता मांय तैनात सेना रा जवानां ने दिन रात खाणे पीणे री चीजां उपलब्ध करायी है। आज फिरोजपुर छावनी मांय, पश्चिमी कमान रा लेफ्टिनेंट जनरल मनोज कुमार कटियार मास्टर स्वर्ण सिंह ने सम्मानित कर्यो हो। **सेना रो गोल्डन ऐरो डिवीजन** स्वर्ण सिंह अर वाणे रे माता—पिता ने सम्मानित कर चुक्यो है।

000

आज अंतर्राष्ट्रीय शतरंज दिवस है। ओ दिन 20 जुलाई 1924 ने अंतर्राष्ट्रीय शतरंज संघ री थापना रे उपलक्ष्य मांय मणायो जावे है। इण बरस समावेशित, शिक्षा, सशक्तिकरण अर मानसिक स्वास्थ्य रे साधन रे रूप मांय शतरंज रे उपयोग खातिर **"सामाजिक शतरंज वर्ष"** री शुरुआत करीजी। इण बरस री थीम **"हर चाल मायने रखती है"**, जकी आपाने याद दिलावे है कि आपणो हर निर्णय आपणे जीवण री यात्रा ने आकार देवे है।

000